

## Грамматикадаңар оңағ. Пілдірістің тиксі омазы

Грамматика — тілдеңер науканың чардығы. Ол сөстернің пүдізін паза хубулызын үгренче. Грамматика ікі пөліктең пүтче. Аның пөліктеріне морфология паза синтаксис кірче.


1. Морфология — грамматиканың пөлігі. Морфологияда сөстер чоох чардыхтары чілі үгренілчелер.

2. Полған на тілде сөстер көп. Сіреп олардаңар тілнің сөстіг пайын үгренчеткенде піліп алғазар.

Сөстер удур-төдір лексика паза грамматика тузалары хоостыра пасхалалчалар. Прай сөстерні алынча пөліктерге чар саларға чарир. Ол пөліктер тіл науказында чоох чардыхтары тіп адалчалар. Хакас тілінде прай он чоох чардығы.


3. Прай чоох чардыхтары ікі пөлікке чарылчалар: пос алынча чоох чардыхтарына паза полызығлығ чоох чардыхтарына.

Пос алынча чоох чардыхтарына нима-нооларны, оларның действиелерін паза пасха-пасха пілдіріглерін таныхтапчатхан сөстер кірчелер. Оларзар сурығ турғызарға чарир: *(кем?) пала, (хайдағ?) өңніг, (нима итче?) көгленче*. Пос алынча чоох чардыхтары сөс пірігістері паза чоохтағлар пүдірчелер. Чоохтағда олар чоохтағның членнері полчалар.



Полызығлығ чоох чардыхтары нима-нооларны, действиелерні, пілдіріглерні адабинчалар, че оларның аразындағы теелістерні таныхтапчалар. Олар пос алынча чоох чардыхтарына удур-төдір

палғалызарға полысчалар: *олғаннар паза чииттер; үгредіг дее, тогыс таа.*



Полызығлығ сөстер чоохтағларны даа палғалыстырчалар: *Чил үбүрче, че соох нимес. Улуғ хар чаап парған үчүн, машиналар аалзар пар полбинчалар.*

Полызығлығ чоох чардыхтары пос алынча чоох чардыхтарының тузазын аймах-пасха итчелер: *килген соонаң, кичееөк килген, иң сіліглері.*

Полызығлығ чоох чардыхтарындар сурығ тұрғызылбинча, олар чоохтағның члені полбинчалар.

**Междометиелер** — ол эмоциялығ сөстер, кізінің пасха-пасха көңнін – хайхасты, өріністі, таңнасты, хығырығларны таныхтапчалар (Щербак А.М. Очерки по сравнительной морфологии тюркских языков. – Л., 1987. –С. 127).

Междометиелер – ол хубулбинчатхан сөстер, оларк кізінің көңнін искіреге киректелчелер, грамматика саринаң пасха сөстернең палғалыспинчалар.

*Йо, пазым азырча.*

*Ооо! — өрін парып, хысхыра түскен ууңазы. (И. Топ.) (өрініс)*

### **Пілдірістің тиксі омазы**

Полған на сөс үс саринаң үгренілче: лексика, морфология, синтаксис. Лексикада сөстің тузазы, хайдағ сурыға нандырчатханы чарыдылча, морфологияда — пүдізі, хубулызы санға алылча, синтаксисте — сөс чоохтағның хайдағ члені полча паза пасха сөстернең хайди палғалысчатханы үзүрілче.

**Пілдіріс** – пос алынча чоох чардығы.

Ниме-нооның пілдіриин, аның качествозын, пасха ниме-нооға, тусха алай орынға теелізін алай ниме-нооның кемни алай нимени полчатханын таныхтапча.

Пілдірістер *хайдаг? хайдагы? нимедегі? хақангы? кемни? нимени?* сурығларға нандырчалар:

- *сіліг, пөзік, хызыл, чоон, тогылах, тирең, өкер, чапчаң, тадылыг, хуйаң, ачых-чарых, мөңіс, (хайдаг?)*;

- *тагдагы, орындагы, тигірдегі, ибдегі, чазыдагы, хардагы, талайдагы (хайдагы?)*;

- *палани, ічемни, чонни, мални, тура ээзіни (кемни?)*.

Пілдірістер ползыианаң полған на ниме-нооның пос-оңдайы, аның аймах-пасха сари көзіділче:

–сілии (*абахай, өкер, согын, сіліг*),

–сыры, өңі (*ах, хызыл, күрең, пора*),

–сині (*чоон, ніске, чабыс, узун, чалбах*),

–омазы, көрімі (*хойрых, пүгір, көрімніг, сылагай*),

–формазы (*тогылах, төрт пулуңныг*),

–тадии (*хуйаң, тадылыг, ачыг, тустыг*),

–чызы (*тадылыг, чабал*),

–предметтернің істіндегі пілдіріглері (*соох, ізіг, нымзах, хатыг, пик, арыг, хазых, агырыг*),

–предметтернің аймах-пасха танығларны, ибіркі оңнағларны, пілдіріглерні паза оңнағларны паалааны (*чахсы, хомай, аар, ниик, наа, кири, чиит, ірік, оох*),

–хылии (*көйтік, хазыр, чабал, аргаас, эрінчек, тарынчах, чалахай, паарсах, тогысчыл*)

–предметтің нимедең иділгені (*агас, тимір, торгы*),

–предметтернің орынға алай тусха теелізі (*тагдагы, часхыдагы, иирдегі, пурунгы, ыраххы*) паза ан. пасх. Пілдірістер ползыианаң піс кирек ниме-

нооны төөй нима-ноолар аразынаң таллап алчабыс. Көзидімге алза, садығ туразында сирер садығчаа тіпчезер: «*Магаа халас кирек?*». - «*Хайдаг? Ах алай хара?*» - «*Хара*».

Пілдірістер чоохты иптіг, пай паза өтіг итчелер. Пілдірістер чох пістің чооғыбыс өө чох хоосха төөй поларчых.

Постарының тузалары хоостыра пілдірістер мындағ л е к с и к о г р а м м а т и ч е с к а й пөліктерге чарылчалар: **качестволыг** (nitelik): *көк, хыныг, узун*; **теелістіг** (nispet, ilişkili): *аттыг, тастындагы, аалдагы*; **тартылгы** (aitlik): *атти, пүкти, кизіни*.

Качестволыг пілдірістернің **тиңңестіріс** (karşılaştırma), **тыыдыс** (rekiştirme) паза **толдыра** нимес (küçültme) формалары пар.

Морфология пүдізінең пілдірістер **пүтпеең** (basit): *хара, айас, өкер*; паза **пүткен** (türemiş): *махтанчых, хойыг, пүүлгі* полчалар.

*Пілдіріс, предмет тузалыг полып, адалыстың орнына киректелчетсе, адалыстар чили, санча, падежтерче хубулча: улуғлар – улуғларның, улуғларны, улуғларга.*

*Абахайларның марии иртче.*

*Чииттерге көп нима пирілче.*

Нима-ноо тузалыг пілдірістер адалыстарох чили **тартылгы** (*абархай — абархайны, хызыл — хызылны*) паза **сказуемай** (*абархай — абархайбын, хызыл — хызылбын*) формаларда киректелчелер.

## Литература

1. Боргояков В.А., Медведева М.А., Кызласова И.Л., Чебодева Л.А. Хакас тілі. Морфология (Пос алынча чоох чардыхтары): үгредіг пособиезі/ В. А. Боргояков, М. А. Медведева и др. – Ағбан: Н. Ф. Катановтың адынаң хакас хазна университетінің издательствозы, 2018.
2. Боргояков М.И. Развитие падежных форм и их значений в хакасском языке. - Абакан: Хакасское отделение Красноярского книжного изд-ва, 1976. - 160 с.
3. Грамматика хакасского языка/под. ред. Н.А.Баскакова. – М.: Наука,

1975. – 417с.

4. Дыренкова Н.П. Грамматика хакасского языка. Фонетика и морфология. Абакан 1948. – 124 с.
5. Катанов Н. Ф. Опыт исследования урянхайского языка. – Казань, 1903.
6. Сравнительно-историческая грамматика тюркских языков. Морфология / под ред. Н. А. Баскакова, Н. З. Гаджиевой и др. М.: Наука, 1997. – 557 с.
7. Сравнительно-историческая грамматика тюркских языков. Региональные реконструкции / под ред. Е. А. Поцелуевского. М.: Наука, 1997. – 767 с.
8. Тараканова И.М. Словообразование имен существительных в хакасском языке (в сопоставительном аспекте). Абакан: Хакасское книжное издательство, 2008. — 174 с. — ISBN 978-5-7091-0381-8.
9. Тараканова (Чебочакова) И.М. Диминутивы в хакасском языке. Абакан: Изд-во ООО «Сервисный пункт», 2011. — 116 с. ISBN 978-5-906247-01-8
10. Хакас тілі. Морфология/ под ред. В.Г Карпова. . Абакан: Изд-во 2004.
11. Чебодаева Л.И. Хакас тілінің практикумы. 050302 — Хакас тілі паза литература специальностьча үгренчеткен студенттерге үгредіг пособие / Л. И. Чебодаева, А. Н. Чугунекова, М. Л. Тахтаракова; филнк. Л.И. Чебодаеваның редакциязынаң. - Ағбан: Н.Ф. Катановтың адынаң хакас хазна университетінің изд-возы, 2009. - 149 с.